

東

華

錄

東華錄

康熙七十二

臣王先謙敬編

周潤蕃恭校

秋七月乙巳朔

上自東直門入臨和碩裕親王福全喪哭之慟

不入乾清門自齋震門入景仁宮諸王大臣齊集宮門奏請

駕

還乾清宮少息

聖體復幸塞外避暑 上傳諭曰朕但恐

太后過哀朕心不安耳俟殯王後朕再啟程至於居便殿者非自

朕始乃

太祖

太宗之舊典也○諭宗人府裕親王之喪皇子

等理應穿孝爾等確議具奏宗人府議同旗之皇子應行穿孝得

旨裕親王朕之親兄豈可止令同旗皇子穿孝隨命皇長子允禔

皇三子允祉

皇四子皇五子允祺皇七子允祐皇八子允禩穿

孝○丙午

上居景仁宮不理政事諭次日復臨裕親王喪諸王

大臣齊集後左門叩首再四勸止

上傳諭曰

太宗時穎親王

之喪 太宗親臨數次載在 實錄此皆爾等所知穎親王係

太宗之姪况裕親王乃朕之親兄乎此朕效法 祖宗並非太過

朕昨因暑天勞頓今日未往明日必當再臨爾等不必懇奏○丁

未 上居景仁宮不理政事臨裕親王福全喪賜內廄馬二匹對

馬二匹散馬六匹橐駝十隻及蟒段銀兩○戊申 上居景仁宮

不理政事召大學士馬齊等至乾清門傳諭曰今歲山東雨水連

綿黎民被災若不豫爲賑濟一經逃散難復安集今當照前養山

東饑民例多遣人員令其撫養爾等可會同九卿議奏○己酉

上奉 皇太后臨送裕親王福全喪○庚戌 上巡幸塞外啟鑾

○丙寅予故安嶽巡撫李鈉祭○己未以何顯祖爲湖廣按察使

原任貴州按察使 ○壬戌予故致仕文華殿大學士伊桑阿祭葬謚文端

○己巳 上手書諭旨諭大學士九卿詹事掌印不掌印科道等官曰今年六月因有二王之事朕心不勝悲痛至今猶未釋然又兼災祲頻告愈加憂鬱身體不安頃往坐湯泉始得稍解仍未全愈至饑民救養之計未嘗時刻不廑於懷近有蘇州織造李煦人來詢知鄉城至泰安田穀稍有可望由泰安至德州被災甚重今歲口外田穀大收口內各處田禾俱屬平常合共計算所糶之穀必不能多今應將漕糧多行截留於山東沿河州縣村鎮俱各存貯以備賑濟平糶之用朕意八旗滿洲蒙古漢軍佐領一千有餘每三佐領下共出一人可得三百人每三佐領交與銀三千兩分派各州縣仍照前去人員養饑民至來年七月今八月內可以到彼這情事爾等可確議至東省今歲錢糧漕米俱應速行停徵議奏爲此手書特諭扈從大學士諸臣閱畢奏曰 皇上恩綸極其

詳盡此外無可再議奏入諭曰爾等既以朕所處爲當著於三佐  
領公派之時將家計殷實部院官員旗下曾爲大僚者及因公革  
職降級者派出其旗下閒散官員及王貝勒八分公屬下之官員  
護衛亦酌行派出派時須令三佐領公同保舉具奏朕所書上諭  
此刻卽行封固速送至京師旣而復傳諭曰包衣佐領亦照此三  
佐領內派遣一人○庚午山東巡撫王國昌奏報賑濟饑民米穀  
數目 上曰朕先諭桑額截漕糧二萬石令扈從部院官員一同  
運至散賑糶賣又命張鵬翮將漕糧二萬石交伊屬員運至散賑  
糶賣此事扈從諸臣所共聞者其交桑額之米石已照朕諭散賑  
糶賣具疏奏結今觀王國昌所奏將程兆麟等所運至之米及常  
平倉收貯米石俱行糶賣散賑與朕原諭不符且王國昌又奏稱  
捐康熙四十二年四十三年官員俸資衙役工食賠補此項米穀

似此何時方能完結此項米穀應令速行賠補貯倉著九卿詹事科道一併會議具奏○癸酉扈從大學士席哈納等奏在京大學士九卿詹事科道會議賑濟饑民一事應差戶部賢能司官令其馳驛速往截留漕運尾船米五十萬石交山東地方官並遵上諭派出八旗官員各支庫銀三千兩往山東會同地方官賑養饑民上曰賑濟山東饑民事關緊要應差大臣分爲三路每路差大臣一員將先派出人員一併往返巡察於事有益自泰安至鄰城爲中路著穆和倫去自濟南至登州爲東路著辛保去自德州至濟甯爲西路著卞永譽去截留漕糧亦屬緊要總漕桑額見今無事著作速前來親看截留其賑濟饑民人員所領銀兩雖係公物而勉力自效有濟於民事回時一併議敘○是月免陝西蒲州被災額賦有差

八月甲戌朔諭吏部山東一省官員平日不知重積蓄備荒災所以一遇凶年束手無策致勞京師遣官賑濟今應將山東合省官員停其升轉俟民生復甦之日再行開復○予故禮部左侍郎王封潔祭葬○丙子以高必宏爲江蘇按察使由直隸守道遷○命致祭裕親王福全如鄭親王例於常祭二次外加祭一次命御史羅占監造墳塋建碑謚曰憲○庚辰予故原任雲南貴州總督王繼文祭葬○甲申刑部尚書王士正等因山左被災奉旨截畱漕米並派八旗官員領帑往賑奏謝得旨朕四次經歷山東於民閒生計無不深知東省與他省不同田野小民俱係與有身家之人耕種豐年則有身家之人所得者多而窮民所得之分甚少一遇凶年自身並無田地產業強壯者流離於四方老弱者卽死於溝壑此等情由爾東省大臣庶僚及有產業之富人亦當深加體念似此荒

歉之歲雖不能大爲拯濟若能輕減其田租等項各贍養其佃戶  
不但深有益於窮民爾等田地日後亦不至荒蕪如果民受寓惠  
豈不勝謝恩千百倍耶○癸巳停今年秋審○丁酉賜沿途外藩  
銀幣鞍馬及喀喇沁蒙古隨圍官兵銀幣○是月免河南商邱山  
東濟甯江南邳州湖廣沔陽等二十一州縣衛被災額賦有差  
九月壬子子故原任禮部侍郎高士奇祭葬○丙辰禮部奏刑部  
右侍郎勵杜訥病故奉旨勵杜訥簡侍內廷勤勞歲久應得卹典  
察例具奏尋給與全葬○丁巳諭大學士九卿等朕因山左災荒  
勞心殫思屢行諮詢山左歲歉非止今歲爲然地方官歷年隱匿  
不報今春朕因閱視河工親見災黎情形始行籌畫賑濟今歲田  
禾雖云失望尙有薄收之處巡撫布政使爲伊等素有欠缺欲巧  
圖完補故甚其詞以奏報又夤緣科道紛紛急奏言盜賊蜂起人

民相食私冀或開事例或撥銀兩因於其中侵蝕託言賑濟而實欲完補虧空以施鬼蜮之謀也今京師遣往三路賑濟人員俱掣籤派撥州縣並不分成災與否一概散賑遣去人員未奉有稽察諭旨惟視巡撫布政使所指地方賑濟應將此事交與三路大臣加意稽察至於御史李發甲條奏盜賊蜂起人民相食亦當明白詢問如盜賊蜂起必有殺人放火搶奪財物糧米之處與失事之人如人民相食亦必有被傷之人與食人之人如有不實卽爲巡撫布政使起見不誠可愧乎○己未山東巡撫王國昌因御史顧素參其匿災不報又復同布政使劉燈欲開事例補其虧空具奏請賜罷斥 上諭大學士等王國昌不過一老實人朕曾詢問李光地張鵬翮伊等亦言王國昌在地方並無苛索亦無劣迹惟劉燈在京時卽落拓無依初斬輔在河工時曾任用之後以中路出

兵道米升至布政使乃一弄巧匪人將王國昌任意驅使甚易事耳此事著同前日諭九卿之旨一併議奏○辛酉貴州巡撫王燕以病乞休允之○甲子上還京師○丁卯九卿會議山東巡撫王國昌內升布政使劉噲及條奏山東災荒事御史李發甲俱應革職得旨王國昌等之事尙未清楚今命何人前往代彼辦事王國昌暫留任劉噲亦著留山東俟事明之日再行具奏布政使錢糧交新任布政使趙宏燮察明報部此係趙宏燮專責彼不詳慎可乎觀御史李發甲條奏其設心以爲山東事務如此緊急遣人賑濟則願去者少不得已非動庫銀必開事例此爲民乎抑爲劉噲乎如此行私本應革職但身居言責從寬降三級留任至外轉時著外轉○湖廣提督俞益謨偏沅巡撫趙申喬奏報紅苗搶掠地方不靖上諭大學士等紅苗事當籌一勞永逸之計苗人固

欽定四庫全書  
平定三苗方略卷之二十一  
五

慣行搶掠而因內地人句通煽誘者亦有之今照招撫廣東八排  
猺人事遣大臣一員前往領荊州兵再酌派廣西湖南貴州三省  
兵齊至苗地併力圍困令其畏懼就撫則百姓可永免侵掠之患  
矣爾等與九卿會議具奏○以陳論爲刑部右侍郎由左副都御史遷

○

己巳大學士九卿遵旨議覆湖廣提督俞益謨等所奏紅苗一事

仍照前招撫廣東八排猺人之例派遣在京大臣率前鋒四十人  
前往調遣荊州及廣西貴州湖南三省兵酌量招撫勦絕 上曰

滿洲兵所向無敵頃廣東僅發前鋒四十名八排猺人望風投降  
地方百姓何能安居尙書席爾達原任川陝總督曾管轄兵丁紅  
苗之事著席爾達同副都統圖思海徐九如前往○吏部奏原任  
陝西臨洮道王永義母朱氏叩闈因其子爲甘肅巡撫齊世武誣

參負屈並齊世武勒令地方立德政碑等款查事在赦前齊世武應免議處 上命齊世武降五級留任復諭大學士等此奏內有請禁督撫建德政碑等語凡居官果優縱欲禁止百姓立碑亦不能止如劣迹昭著雖強令建後必毀壞聞昔日屈盡美爲廣西巡撫回京時百姓怨憾持鋤鋸鋤其馬迹庶民之心豈能強致耶禁止立碑一段著刪去之○辛未內閣學士張榕端以病乞休允之○壬申以高起龍爲貴州巡撫于準爲四川布政使由浙江按察使遷○是月免直隸永清浙江遂安湖廣江陵等十七州縣被災額賦有差

冬十月甲戌諭大學士等江南督撫提督著公同造洋船二十隻俟來年春令山東水師營官兵前往江南取至山東候用目前山東海盜非確係積賊皆貿易之人貨本虧折因肆行搶奪可命學

士常壽前往招撫再令筆帖式三人往山東三路問賑濟事並視民閒情形朕自幼聽理政事極其敬謹時時惕厲於心今已年艾諸事更加戒懼不敢稍有懈惰忽畧也○丁丑諭吏部戶部兵部陝西省爲巖疆重地當出師塞外時曾經厯其邊境而西安一路未及親蒞頃陝西督撫諸臣言秦民望幸之心至殷至切合詞陳奏河南山西巡撫等亦諄切具請乘冬令農隙之時觀覽民風詢察吏治簡閱禁旅整飭軍營實爲要務用是輕裝約從諏吉西巡沿途一切供御皆內廷儲備纖毫不取辦於地方卽偶有市易之物亦敕所司依時價給值不許錙銖抑勒所過大小官吏勿借詞供億私派閭閻地方官不許與扈從人員指稱交戚私相餽遺違者並以軍法從事其扈從人員宜約束僕役勿使妄行乘輿所至市廛隴畝宜各安生理米豆薪芻等物民閒照常貿易不必禁止

惟懷私挾詐衝突告訐者所告事不准理仍嚴加治罪爾等卽傳諭屬從官員人等並行各督撫令於經過府州縣城市村莊徧示曉諭俾咸悉朕懷○戊寅諭大學士等朕觀河道已治河道總督張鵬翮及河工官員俱甚效力黃河一切工程朕知之最悉先是永定河用埽甚有裨益是以朕諭張鵬翮黄河亦宜用埽張鵬翮回奏永定河水小可以用埽黃河甚大難以用埽朕諭姑試用之張鵬翮因而用埽河隄今果堅固至於洪澤湖水勢甚險而隄岸復高往來舟楫一遭漂沒人尙可攀援獲命自此釘椿木後果有裨益○諭吏部工部黃淮兩河關繫運道民生最爲緊要朕念治河國家大事夙夜靡懷未嘗少釋披圖治水雖已悉其源流顧水勢變遷不常必確知洞悉方可實見施行是以不憚勤勞屢親巡閱

察其險易之形勢審其疏導之機宜緩急次第俱有成畫至於簡命河臣倚任甚切凡所屬官吏皆聽舉用大修工程費以百千萬計歲修帑金亦以數十萬計乃康熙三十七年黃淮並報原任河道總督董安國不堅築隄堰疏通海口因而河身勢高溢出河岸以致倒灌洪澤湖口湖水從六壩旁洩由運河入下河淹沒民田於是罷董安國以于成龍代之朕隨授以治河方畧詳加指示康熙三十八年親往閱河駐蹕清口河干又面諭于成龍清口宜築挑水壩挑黃水使趨北岸方可免倒灌清水之患隨指定其地再三申命于成龍不遵朕旨致無成功及用張鵬翮爲河道總督面諭云頃已發帑金數百萬令大臣官員往高家堰築隄閉六壩使偏洪澤湖水暢出清口而清口築挑水壩尤爲緊要此壩不築則黃水頂衝斷不能使向北岸湖水必不得暢流張鵬翮遵奉朕言

壩工築成黃溜遂直趨陶莊清水因以直出疊經伏秋大漲並無倒灌之事其浚張福口等引河築歸仁隄疏人字芒稻涇澗等河開大通口皆遵朕旨一一告竣今年春朕閱河至桃源見龍窩等處頂衝危險命增築挑水壩比壩工剋日訖事河勢遂平中河仲莊閘口以與清口相對特命改於楊家莊漕輓安流商民利濟曩時黃水漲泛或與岸平或漫溢四出今黃河深通河岸距水面丈餘縱遇大漲亦可無虞矣張鵬翮所修工程雖悉經朕裁斬而在河數載殫心宣力不辭艱瘁又清潔自持一應錢糧俱實用於河工無纖毫浮耗朕心深爲嘉悅所屬大小河員並皆勉勵赴工共襄河務亦屬可嘉自總河以下各官爾二部卽議敘具奏○己卯賜曹維城等一百二人武進士及第出身有差○以姜楠爲左副都御史由左僉都御史遷○庚辰以徐秉義爲內閣學士由詹事遷○辛巳裁

永定河分司一〇王午諭戶部山東去歲凶歉收各州縣豐歉不一  
已分別蠲租賑濟比東省又告潦災朕續發帑金遣官分道散賑  
仍命大臣經理所在饑民資以全活不至仳離失所猶念被災之  
後民力未舒宣更加德澤以宏休養所有明年地丁銀米盡行蠲  
免其積年逋賦亦察明免徵○以李法祖爲浙江按察使由督借道遷

○子故原任兵部左侍郎張集祭葬○癸未 上西巡啟鑾○諭

大學士等見今扈從給事中滿普御史顧素令其後行查有僕從  
生事者卽時鎖拏並將其主亦行參究至地方官員若私行禁阻  
民間市賣亦指名奏參○庚寅吏部奏山東巡撫王國昌河道總  
督張鵬翮等擅動常平倉米穀賑濟擬各降一級其所動米糧仍  
令賠補 上諭大學士等朕曾諭總漕桑額總河張鵬翮將漕米  
各轉運二萬石一面賑濟饑民俟願往賑濟效力人員到日交與

伊等賑濟詔旨甚明張鵬翮等亦曾具摺奏明何故擅動常平倉米穀賑濟著將朕原諭並張鵬翮所奏摺子逐一查明具奏○理藩院議准扎薩克大喇嘛綽木珠爾喇卜扎木巴奏將伊所原居洮州衛卓奈克依特之廟伏怨開廣修造得旨取邊氓之地以修廣廟宇關繫民生嗣後凡有修廣廟宇與民閒田廬有關者永行禁止○以周士賢爲山東按察使由直隸口北道遷○癸巳 上自井陘

縣至固關駐蹕柏井驛先是 上以柏井驛水少命隨行諸臣侍衛官兵執事人等分三隊陸續進發及駕至柏井驛井水早已盈滿且處處水泉溢涌令治儀正存住等傳諭鄉導官副都統肇賴曰始以柏井驛水少因分隊進發今至此觀之井水盈滿且水泉各處涌發著移文後隊諸臣不必以無水爲憂也○予故原任刑部侍郎加尙書銜任克溥祭葬○丁酉 上幸太原○戊戌諭山

西巡撫噶禮朕君臨天下四十餘年無一刻不以蒼生爲念近因  
西省望幸甚切故於冬令農隙減從輕騎由晉及秦入境以來觀  
風問俗見民生畧有起色閭閻之間俗尚樸儉朕心少慰惟是晉  
省水運不通歲或不登卽難籌畫雖有州縣存貯之米穀未必實  
數具在今歲山西收成頗佳爾等仰體朕愛民如子之至意曉諭  
民間若歲豐用奢則荒年必致匱乏教之以禮義導之以守法重  
農務本藏富於民則朕無西顧之憂矣凡朕所經之處必大沛恩  
澤因今歲東省災甚已蠲四十三年地丁錢糧又免雲貴廣西四  
川地丁錢糧所以但將四十二年以前山西所屬州縣未完銀兩  
米草盡行蠲免以示朕加惠黎元之意太原百姓聞上將啟鑾  
齊集行宮前懇留上爲再留一日○庚子以裕憲親王福全世  
子保泰襲封○辛丑上駐蹕祁縣閱太原城守官兵騎射分別

賜金劣者革退遣還京師閱射時有一兵丁乘馬驚逸漸近御仗  
散秩大臣公傅爾丹疾趨向前擒之使下並勒止其馬 上還行  
宮傳集內大臣等諭傅爾丹曰今日閱射時兵丁所乘之馬驚逸  
漸近御仗諸年少大臣俱效年老大臣旁觀不動惟爾直前勒止  
之可謂繼武前人矣特賜爾貂皮桂一領嗣後益加勉力毋以身  
爲大臣而不思奮力向前也○是月免直隸武清湖廣永陽等十  
二州縣被災額賦有差

十一月乙巳 上次洪洞遣官祭女媧氏陵○戊申 上駐蹕聞  
喜遣官奠大學士衛周祚墓○辛亥大學士馬齊等奏臣等以賑  
濟山東饑民原旨並張鵬翮所奏摺子啟奏奉旨著臣等問張鵬  
翮彼云 皇上曾面問彼彼已辭窮矣 上曰朕於眾人之前問  
張鵬翮爾嘗以經義奏對經義以本心爲要爾河工人員動用常

平倉穀賑濟掠取名譽今令抵償則云應令山東官員抵償揆之  
本心其能忍乎爾居官清廉河工效力告有成績是皆爾之善處  
朕甚嘉之至爾之所保舉者十之七八皆徇情面如索額圖家人  
爾曾保舉可云無此事平時張鵬翮不能對惟垂涕而已此動用  
倉穀著張鵬翮王國昌等均攤賠償今歲山東無收令於康熙四  
十三年四十四年內賠完○調甘國基爲雲南按察使以高啟桂  
爲河南按察使由山西冀  
甯道遷○壬子 上至黃河岸由閻處渡河未  
渡之先眾皆以爲河寬風大隨駕人眾恐一二日內未必能全渡  
及 上至河岸天氣晴朗風波不興且傳諭渡河時勿得攔阻各  
隨其便不終朝而渡畢眾皆神異之 上次潼關遣官祭西嶽○

甲寅 上駐蹕渭南閱固原提標官兵射畢 上諭大學士馬齊  
朕巡厯諸省觀綠旗兵丁無如提督潘育龍之兵者射既熟嫾人

復勁健此皆統率將領之訓練有方也自提督以下官員可俱加  
一級○乙卯 上駐蹕臨潼遺宮祭漢文帝陵○丙辰 上幸西  
安外藩蒙古諸王貝勒台吉等來朝○丁巳 上閱西安駐防官  
兵射○翰林院以撰擬周文王武王祭文進呈 上諭文王武王  
皆古之聖君非他帝王可比且向以孔子聖人已書朕名致祭矣  
此祭文內亦須書名○戊午諭四川陝西總督覺羅華顯等朕撫  
有區夏宵旰勤勞秦省天下要地時廩朕懷曩者連歲荒旱所司  
未經奏報朕訪聞多方籌畫運米拯救蠲正賦免夙逋安集流離  
秦民始得少蘇但秦省不通水運撫綏尤宜加意故不憚隆冬遠  
臨斯土見百姓歡迎載道且知今歲有秋地方文武官吏更能恪  
勤奉職滿漢軍士亦皆訓練有方朕心甚悅凡巡幸所至必大沛  
恩膏今將陝西巡撫及甘肅巡撫所屬地方康熙四十二年以前

各項積欠銀米草豆錢糧盡行蠲免俟四十三年直隸各省咸獲  
豐稔當將秦省四十四年正供亦行免徵該督撫卽通行曉諭俾  
窮鄉僻壤小民均沾實惠以副朕愛養黎元至意○遺官祭周文  
王武王康王漢高祖宣帝唐高祖太宗宣宗陵○遣官奠提督張  
勇總兵梁化鳳墓○賜西安耆老白金○己未 上大閱於西安  
以將軍博齋訓練有方解所佩弓矢賜之仍賜總督覺羅華顯巡  
撫鄂海蒙鞬弓矢 上御箭亭賜官兵宴並宴蒙古諸王貝勒台  
吉等兼賜銀幣○庚申賜陝西官吏及外藩諸王宴於行殿前○  
辛酉予將軍督撫以下驍騎校把總以上各一級是日秦省軍民  
集行宮前攀留 聖駕 上曰民心如此殷殷朕當再留一日○  
命諭德查昇傳諭巡撫鄂海曰蓋厯縣處士李容人好讀書明理  
學屢徵不出朕甚嘉之特手書操志清潔匾額賜之○癸亥 上

回鑾○戊辰李成林以衰老解任以甘國基爲河南布政使由雲南按察使○己巳上駐蹕陝州命皇三子允祉及侍衛等往閱三門

底柱○是月免直隸南皮山東武定河南杞縣等二十二州縣被

災額賦有差

十二月乙亥上駐蹕修武諭兵部懷慶總兵官王應統標下兵

丁射技不堪營伍不整卽王應統本身射亦荒疏令其甲冑送駕

官兵鎧介全無將王應統並伊標下千總陳起蛟把總聶廉王寶

俱械繫帶往京師俟開印鞠審嚴加議處○庚辰上駐蹕磁州

杜村鋪御書賢哲遺休額懸先賢子貢墓○壬午追賜廣西死

事富川知縣劉欽鄰謚忠節○乙酉諭大學士等直隸學院楊名

時考取生員以能背誦五經者卽取之照例考取文字人心自服

如考取背誦五經事繁亦不合例且楊名時秉性好異考取時但

係富室文字雖好斷斷不取儻貧寒內有粗知文意者卽取之考  
校應論文學優劣豈得論其貧富耶○己丑禮部尙書韓菼以病  
乞休得旨韓菼以工於時文故屢經擢用至禮部尙書前管翰林  
院事務時於庶吉士並不勤加敎習每日率領飲酒以致庶吉士  
亦皆疏於學習至於九卿會議之處不以國事直言惟事瞻徇所  
行甚爲非體殊不逮其所學今自知其非稱病求罷殊屬不合著  
仍留任嚴飭行○庚寅 上還京師謂大學士等前南巡多由舟  
行官民羣集兩岸迎駕頃西巡皆由陸路凡臨幸郡邑官民無不  
扶老攜幼懼騰道左每清問及之又令在乘輿左右備諮地方之  
利弊彼皆抒誠陳奏是以風俗人情靡不洞悉朕巡幸七省畿輔  
秦晉民俗豐裕江浙則較三十八年時更勝山東近因水旱大異  
疇昔河南百姓生計甚艱此二省之民深廩朕懷又聞各省火耗

俱是加一錢糧最少者惟有甘肅通計正額共二十八萬有奇加耗亦止二萬八千州縣官錢糧既少加耗無幾不敷用者宜或有之其餘賦額皆多如一州縣正額有二三萬加耗卽至二三千宜敷用矣而州縣官仍有以艱難告者其故安在朕隨地諮訪督撫雖有不受餽遺者然餽藩臬者若干餽道府者若干豈可盡云廉吏乎○辛卯諭大學士等朕頃巡幸西省閱視汾渭二水俱屬大河直與黃河相通河南等處米穀似可由黃河轉運但聞三門底柱水勢極溜船不能上朕欲親往閱視因陝州知州奏無路徑斷難行走遂未果行特命三貝勒允祉同近御侍衛往視據回奏言伊等遣人乘騎涉河一道閩有神人鬼三門俱係鑿石開通水從三門流出其勢甚寬其流甚急古人於巖上鑿有曳船眼孔但未經以船試驗不知可否行走前總河辦輔亦曾奏黃河通於汴河

但於墊年久若行疏導即可運糧朕至河南閱河南府居各省之中水路四達最爲緊要之地應於此處儲積米穀每年田畝豈能必皆豐收儻山陝等省閒或收成歉薄即可將此積貯米穀修造船隻由黃河挽運若到三門底柱船不能上亦可於三門底柱造船剝運以至山陝誠使河道疏通則商賈人民大有裨益所宜於無事之時豫爲籌畫者也豫省每年解京漕糧二十萬石有奇若將豫省三年漕糧截畱備用則陝西等省雖值歉收之年將此米穀運至彼處賑濟殊屬有益俟明歲遣大臣往視又諭朕今番西巡見直隸河南陝西山西四省接壤山西澤州人如授河南懷慶府地方官雖云隔省相去實不過百里得無徇庇伊宗族親戚之私意乎又直隸人在河南接壤處河南人在直隸接壤處居官者甚多嗣後補授外官時掣籤所得地方如隔伊原籍五百里外聽

伊赴任如五百里內雖隔省著回避○封恭親王常甯庶出子海  
善爲多羅貝勒○壬辰御史劉若鼐奏參山西巡撫噶禮貪婪無  
厭虐吏害民計斂數十餘萬太原府知府趙鳳詔爲噶禮心腹專  
用酷刑以濟貪壑得旨著噶禮明白回奏○是月免直隸景州江  
南徐州浙江諸暨湖廣監利等十八州縣衛被災額賦有差○是  
歲朝鮮琉球安南來貢○人丁戶口二千四十一萬一千四百八  
十田地山蕩畝地五百九十八萬六千九百五頃六十五畝有奇  
徵銀二千六百八十九萬七百六十九兩有奇米豆麥六百九  
十六萬八千七百九十二石有奇草二百八萬一千六百八十五束  
茶十五萬七千四百七十八引行鹽四百三十一萬九千三百七  
十八引徵課銀二百六十九萬六百一十八兩有奇鑄錢二萬三  
千八百六萬六千八百有奇

臣王先謙敬編

周潤蕃恭校

康熙四十三年甲申春正月辛酉諭大學士等朕數巡幸諮詢民生利弊知之甚詳小民力作艱難每歲耕三十畝者西成時除完租外約餘二十石其終歲衣食丁徭所恃惟此爲民牧者若能愛養而少取之則民亦漸臻豐裕今乃苛索無藝將終年之力作而竭取之彼小民何以爲生耶如朕前遣侍衛至鐵索橋挂匾還京回奏彼處督撫餽六千餘兩夫一侍衛而費至此則凡部院司官筆帖式等差遣往來者又不知煩費幾何去歲所遣祭告諸臣還都朕曾問一二人彼雖飾辭以對然地方所費亦不少矣目今巡撫皆有廉聲而司道以下何嘗不受州縣餽遺總之此時清官或

分內不取而巧取別項或本地不取而取償他省更有督撫所欲扶持之人每歲暗中助銀數彼掠取清名不踰二三年隨行薦舉似此互相粉飾釣譽沽名尤屬不肖之極至於蠲免錢糧原爲加恩小民然田畝多歸搢紳豪富之家小民所有幾何從前屢頒蠲詔無田窮民未必均沾惠澤約計小民有恆業者十之三四耳餘皆賃地出租所餘之糧僅能度日加之貪吏苛索蓋藏何自而積耶朕比年巡行七省惟秦晉兩地民稍充裕畿南四府及河南一路殊覺生計艱難山左初次巡幸民甚饒裕繼而少減今則大異往昔矣皆由在外大小官員不能實心體恤民隱爲民除弊而復設立名色多方徵取以此民力不支日就貧困科道官職司風紀當一切不避見之敷陳今惟挾仇報復者挂之彈章否則斷斷不言或專倚一人藉聲勢而聽其指使然後敢言甚有大言不慙妄

自矜誇者考其行事與言迥別子曰先行其言而後從之夫己之  
言己且不能行徒見之敷陳何益之有○吏部奏補四川陝西總  
督著兼管四川陝西總督事○山西巡撫噶禮以御史劉若鼐奏  
參其貪虐各款盡屬誣陷遵旨回奏報聞○戶部議覆山東巡撫  
王國昌擅收賑養饑民官員銀兩貯庫以致不得卽行賑養應加  
議處得旨王國昌著解任○以趙世顯爲山東巡撫由安徵布政使遷○

壬戌命四川陝西河南山西督撫會勘三門底柱○癸亥 上幸

南苑大閱○江蘇巡撫宋犖奏長洲縣生員嵇永仁康熙十二年  
爲原任福建總督范承謨延聘入幕值耿逆變亂被繫三載迫脅  
不從從容就死妻楊氏艱辛守志孝養舅姑撫孤成立今年已五  
十有五照例請旌下部議從之○戊辰 上還暢春園○諭大學

士等近入旗漢軍根圖任外吏不思在京效力或一家兄弟子孫數人俱外任者有之可著各都統察出酌調還京任用若不察出

調還罪卽在伊等可傳諭知之○以朝琦爲山西布政使由子牙河分司

遷○奉差勦撫紅苗吏部尙書席爾達奏報招撫紅苗三百餘寨

惟天星寨等十五寨紅苗不順臣同湖廣提督俞益謨等率兵於

康熙四十二年十二月從報木營抵龍椒洞圍天星寨陸續搜剿斬首千餘級餘盡納降其添設防汛官兵事宜俟會同督撫定議

奏聞下部知之○己巳

上啟鑾謁

陵○內閣學士阿藍太以

老病乞休允之○是月免直隸開州武清縣上年水災額賦有差

二月癸酉

上謁

暫安奉殿

孝陵至仁孝皇后

孝昭皇

后孝懿皇后陵奠酒○以殷特布爲內閣學士

由內閣侍讀學士遷

○轉

王頊齡爲禮部左侍郎以王九齡爲禮部右侍郎由內閣學士遷轉布雅

努爲兵部左侍郎以貝和諾爲兵部右侍郎

由四川巡撫遷

○甲戌封淮

神爲長源佑順大淮之神賜

御書靈瀆安瀾額又安東縣大通

口海神廟宿遷等縣黃河金龍四大王廟清河縣清口淮神廟皆

入春秋祀典○丙子禮部議覆准貴州學政張豫章奏貴州考試

人才甚少請照滇省之例許同省隔府之人往試再府州衛等學

請各添設訓導一縣學各添設教諭一從之○戊寅諭大學士等

近日各省學臣其中不肖之徒惟利是圖總不知愛惜人才其根

源在禮部科道督撫皆有規禮故無敢直言之人更有甚者取不

通文理之寒士以博清名諸如此弊不可枚舉又聞提督浙江學

政文志鯨將考試二三等生員內竟有加杖責者文志鯨身係翰

林特簡之使提督學政乃如此暴戾可乎○辛巳贈故四川陝西

總督覺羅華顯太子太保兵部尙書予祭葬加祭一次謚文襄○

以能奏爲四川巡撫

由甘肅布政使遷

○裁永定河筆帖式二十設同知

一〇壬午吏部議覆江南江西總督阿山奏參江西巡撫張志棟於大計前託臣薦舉參劾官員照彼稿具奏又袁州府知府馬斌居官平常張志棟竟行列薦南昌縣知縣王廷對虧空銀四萬餘兩張志棟不行參奏九江府知府朱儼清廉素著彭澤縣知縣吳士宏品行素優張志棟俱抑而不薦其布政使李興祖按察使劉廷璣及道府等員俱附和巡撫等語應將該撫及附和司道府等官俱行革職從之○乙酉予故原任內閣學士徐嘉炎祭葬○丁亥工部議覆淮安府山安同知革職佟世祿叩闈訴河道總督張鵬翮捏伊冒帑誤工擬以重杖又將他人應賠錢糧坐令伊名下賠補應令漕運總督行查得旨著江南江西總督阿山河南巡撫徐潮會審具奏○戊子湖廣巡撫年遐齡以疾乞休允之○癸巳

上還京師

○以李基和爲江西巡撫

由湖北布政使遷

黃明爲江西按

察使

由陝西提道遷

○乙未以李鎧爲內閣學士

由通政使遷

○丙申以京城

米貴月發通倉米三萬石於五城平糶

○丁酉刑部議覆原任河

南總兵官王應統營伍不整送

駕不敬擬應立斬得旨王應統

改斬監候

三月庚子朔調朝琦爲甘肅布政使

以雍泰爲山西布政使

由山西布政使遷

○辛丑上御經筵

○壬寅以劉殿衡爲湖廣巡撫

由江蘇布政使遷

○癸卯諭大學士等部院情弊朕知之甚悉凡部院駁回事件有應

駁回者亦有有故而駁回者儻欲實指其事朕並其始末皆能細

言之朕日聽萬幾惟據其理而處之以公平斷不瑣屑苛求但諸

臣當自知之知足方不辱也

○己酉諭刑部熱審謂之慎刑夫刑

在平時亦宜加慎何必因然而始慎也如謂熱審減等於犯人有

益則於原審時卽以減等議之豈不更有益乎且犯人苦熱猶可而苦寒更甚熱旣宜審則寒亦宜審旣多此一事不肖官員遂欲延至熱審故意遲玩其停之○都察院等衙門議奏內河外河分司塞可圖等侵欺錢糧擬斬工部尙書薩穆哈侍郎恩特來道甘國樞司員費仰嘏等俱照侵蝕銀兩數目多少分別革職治罪尙書王鴻緒侍郎李元振雖未侵蝕但未經查出應革職得旨王鴻緒李元振從寬革職畱任餘依議○庚戌詔賑山東河間饑民就食京城者○詔甄別敎職○調石文晟爲廣東巡撫由雲南調○辛酉內閣學士常授以往撫海寇請訓 上諭沿海諸省雖小有海賊聞俱嘯聚於廣東新會縣地方若不靖此處不能奏績爾可先至福建將已獲賊中有緊要之人不必帶去其餘量帶一二人前往廣東至新會縣時先遣一人偕彼同往招撫遣去之時爾可令

彼曉諭云爾等情事皇上皆已洞悉爾等歸順則已否則必加大兵盡行埽滅如此曉諭則新會賊寇盡可招撫招撫之後爾可自廣東而福建而浙江而山東沿海招撫而來自可奏績○諭大學士等朕因山東及直隸河間府等處饑民流至京城者甚多特命八旗諸王貝勒大臣總管內務府各官及漢大臣官員於數十處立飯廠日煮粥賑濟務使流移之人得所酌量賑給數月但此等饑民棄其家業聚集京城以餬其口實非長策應作何料理始復舊籍得安生計爾等會同九卿詹事科道等確議具奏尋大學士九卿等議奏山東饑民在京師者應選各部賢能司官分送回籍其直隸河間等處饑民應令巡撫李光地設法領回從之○壬戌上幸南苑行圍○乙丑四川陝西總督博齋等奏臣等會勘三門中流爲神門水勢甚澑南爲鬼門水更洶湧北爲人門水勢稍

緩三門之下百餘步爲底柱再下二里有臥虎灘臣等用船載糧三十石從臥虎灘縛挽上過人門但澑急灘多行船艱難不如陸路撥運之便豫省漕糧截畱於河南府備貯陸運至陝州西門外太陽渡上船計程三百餘里腳費比河路減省謹將三門河路繪圖進呈得旨九卿詹事科道等會議具奏○丙寅以溫達爲工部尚書由左都御史遷色德里爲工部左侍郎穆和倫爲工部右侍郎俱由學士  
由左副都御史遷姜構爲工部右侍郎由左副都御史遷○丁卯 上還宮○戊辰以佟毓秀爲雲南巡撫由廣東布政使遷

夏四月壬申以舒輅爲左都御史由刑部左侍郎遷舒虎鼐穆丹俱爲內閣學士舒虎鼐由內閣侍讀學士穆丹由少詹事遷○癸酉命侍衛拉錫等探視河源○轉屠粹忠爲兵部左侍郎調王九齡爲兵部右侍郎胡會恩爲禮部右侍郎由兵部左員外郎遷○乙亥兵部尚書范承勳以老病乞休允之○

以傅作楫爲左副都御史

由左僉都御史遷

○戊寅直隸巡撫李光地因

河間水災饑民流入京師自陳不職請解任 上諭大學士等李

光地著畱任其居官有何可議但彼專信門生常爲所誑凡人口

講道學彼卽深信之夫道學豈易言哉孔子曰先行其言而後從

之人之品行必始終不易朕始信之若徒託之空言而無實事則

亦何益之有非特此也凡有職任者一有所爲善惡立見更不宜

輕言也○己卯 上幸髻髻山啟鑾○以常授爲刑部右侍郎

由內

閣學士遷

○庚辰 上駐蹕髻髻山○河南巡撫徐潮奏臣遵旨查勘

汴河其故道惟賈魯河自中牟縣經祥符等縣至江南太和縣達淮今雖通流但不甚深廣應加挑濬再鄭州之北新莊地方有一

支河可築壩建閘以通黃河下部知之○壬午 上還宮○禮部

尙書韓菼以病求罷命在任調理○乙酉調施世綸爲安徽布政

使以董昭祚爲湖南布政使

由安徽按察使選

○戊子貴州巡撫高起龍

以老病乞休允之○山西巡撫噶禮奏遵旨查勘汾河自河津縣

至洪洞縣船皆可行惟自趙城至省城石多灘淺非製造小船實

難行走應倣麻陽船式製造始可濟運下部知之○己丑 上閱

永定河啟鑿○以阿世坦爲內閣學士

由翰林院侍讀學士選

○庚寅 上

徧閱永定河隄諭大學士馬齊永定河關繫緊要巡撫李光地奏

分司郭治不能辦理河務祈另簡授爾可問李光地補用何等人

方於事有裨益再向原任分司齊蘇勒問分司余圖渾何如筆帖

式內有諳練河務可用者否馬齊問明奏曰臣問李光地據云應

仍用分司二員筆帖式四十員臣又問李光地爾前奏請裁分司

一員筆帖式一半今何故又請補授據云臣一時昏瞞奏請裁汰

伏祈 皇上仍照前補設分司筆帖式始於河工有益問齊蘇勒

據云余圖渾任分司三載辦事勤慎筆帖式格渾阜保崔廷棟色白黑等辦事無誤 上曰齊蘇勒任分司已六年著停其赴分司之任余圖渾著再畱三年阜保以主事補授永定河分司格渾崔廷棟色白黑並舊任筆帖式共補十人新筆帖式可補十人俱令速赴工所 ○壬辰 上閱子牙河 ○丙申 上還京師 ○陝西巡撫鄂海奏臣遵旨查勘渭河惟寶雞至郿縣百四十餘里水落之時重載難行郿縣以東河深水平重船無阻可以輓運下部知之五月壬寅諭滿洲尙書侍郎等天下之民所倚以爲生者守令也守令之賢否係於藩臬藩臬之賢否係於督撫督撫又視乎部院大臣而行部院大臣所行果正則外自督撫而下至於守令自爲貞吏矣今工部弊端發露爾等亦知愧否工部之弊朕屢降嚴旨切責並不悛改以至於此郎中費仰嘏等俱九卿保舉之人仍爾

作弊侵蝕河工帑金殊屬不堪堂司官上下扶同但利之所在罔顧身命此何謂也爾等身爲大臣誠能彼此箴規有所見聞卽爲剖示屬官有品行不端者卽罷斥之庶幾無玷厥職今部院諸弊爾等豈果不知但恐結怨於人隱忍不言科道官員亦因彼此掣肘不肯條奏舉劾耳嗣後如有不謹識朕諭仍循故轍經朕察出必不姑宥○甲辰以孟世泰爲江西布政使原任貴州布政使○乙巳以鄒嘉琳爲安徽按察使由陝西漢興道遷○甲寅奉差山東賑濟工部侍郎穆和倫奏饑民已賑麥秋成熟請撤回賑濟官員 上諭大學士等觀穆和倫所奏山東麥秋大稔秋田播種往賑官員俱各勤勞賑濟殊爲可嘉穆和倫及往賑官員仍著暫畱彼處此際尙當酌量資補俟至七月奏報秋收情形後再令還京○辛酉以于準爲貴州巡撫由四川布政使遷王毓賢爲湖北布政使原任貴州布政使○是月

免濟南等府屬九十四州縣衛上年水災稅糧並緩征本年額賦  
六月甲戌禮部侍郎羅察緣事降調○乙亥 上巡幸塞外啟鑾  
○己卯以宜思恭爲江蘇布政使由直隸守道遷○癸未以鐵圖爲禮部  
右侍郎由內閣學士遷○戊子先是 上諭大學士九卿等各省民間所  
用斗斛大小迥然各別此皆牙僧平價之人牟利所致又升斗面  
寬底窄若少尖量卽致浮多稍平量卽致虧少弊端易生職此之  
故嗣後直隸各省斗斛大小應作何畫一其升斗式樣可否底面  
一律平準至盛京金石金斗關東斗亦應否一併畫一爾等議奏  
至是大學士九卿等議覆查順治五年戶部將供用庫舊存紅斛  
與通州鐵斛較紅斛大鐵斛小將紅斛減改爲斛樣順治十二年  
鑄造鐵斛二十具一存戶部一貯倉場直隸各省皆發一具今應  
令工部照部中鐵斛鑄造七具分發盛京順天府五城外其升斗

俱改底面一律平準各造三十具分發直隸各省等處永遠遵行  
盛京金石金斗關東斗皆停其使用從之○諭大學士等觀山東  
巡撫所奏今歲春麥大穰又問自山東省來人咸云民生大有起  
色不似從前被災景象此甚非易致也山東百姓今始獲甦明歲  
錢糧不可急徵若秋田有收再當商酌爾等識之俟十月十一月  
間啟奏○己丑以拉都渾爲內閣學士由內閣侍讀學士遷董廷恩爲廣東  
布政使由湖南按察使遷○丁酉諭起居注官揆敘等古今講道學者甚  
多而尤好非議人彼亦僅能言之耳而言行相符者蓋寡是以朕  
不尙空言斷不肯非議古人何以言之凡人各有短長棄短取長  
始能盡人之材若必求全責備稍有欠缺卽行指摘此非忠恕之  
道也故孔子當時惟節取人之善隱諱人之短凡事求諸己不非  
諸人是豈可少容私意於其間乎又人見講道學之人或不見用

輒爲太息以爲彼果見用必有可觀此亦徒見其空言而云然也  
若果見用言行亦未必相符惟宋司馬光編輯資治通鑑論斷古  
今盡得其當而後之論者反未嘗置諸講道學之列司馬光乃宋  
朝名相言行相符由此以觀不在空言也故君子先行後言果如  
周程張朱勉行道學之實者自當見諸議論若但以空言而講道  
學斷乎不可朱子洵稱大儒非泛言道學者可比擬也

臣王先謙敬編

周潤蕃恭校

秋七月己亥朔以郎廷棟爲湖南按察使

由直隸湖昌道遷

○予故廣東

巡撫彭鵬祭葬○庚子傳諭在京大學士等近觀塞外雨水調和

百穀暢茂爾等可簡善馳賢能中書分遣直隸河南山東各一員

問明雨水多寡禾苗情形來奏其差往直隸巡撫處者並探永定

子牙二河水勢通州之河卽著倉場侍郎具摺回奏○辛亥以鄭

昱爲四川布政使

由廣西按察使遷

○乙卯扈從大學士翰林官等俱齊

集行宮前奏曰皇上巡幸塞外於萬幾餘暇惟以書射爲事臣

等口見皇上神射發無不中伏求皇上御書之時亦賜臣等

瞻仰於是上率諸皇子等出行宮門外大學士翰林官等俱侍

立上坐書大字小字頃刻數十紙諸臣聚觀無不驚喜 上曰

朕自幼好臨池每日寫千餘字從無間斷凡古名人之墨蹟石刻無不細心臨摹積今三十餘年實亦性之所好卽朕清字亦素敏速從無錯誤凡批答督撫摺子及硃筆上諭皆朕親書並不起稿其事之稍有關繫者雖歲月經久亦不遺忘故批發之旨俱存所司朕處全無底稿也○乙丑以卞永式爲廣西按察使由四川永  
○丁卯以許嗣興爲河南布政使由廣東按察使遷

八月庚午 上召大學士及起居注官等論滿洲諸翰林官學問優劣畢大學士等奏曰 皇上天縱之聖記識不忘古今莫及上曰朕覽過之書雖日月間隔不甚遺忘今雖年歲稍增而記性不減於前卽目前陳列諸書內欲稽考某卷某處但指令近侍取之亦可卽得不至錯誤大約存心清虛不但事不遺忘於養生亦

爲有益又諭曰臣下如有欺蒙朕斷不姑宥此外若爲朕躬服食  
諸事從未笞責一人昨往釣魚處膳房所備止有肉肴竟忘攜帶  
飲食諸皇子及近御侍從俱欲笞之朕止之曰彼無心偶忘攜帶  
耳此乃小事可寬宥之○癸酉予故內閣學士李應鷹祭○兵部  
議准雲南貴州總督巴錫奏紅苗新附銅仁協應添額兵一千二  
百名分爲左右二營增遊擊二守備一千總二把總二領兵防汎  
再添設同知一巡檢一專理苗務從之○戊寅內閣學士徐秉義  
以老乞休允之○以黃國材爲廣東按察使由雷瓊道遷○甲午予故  
原任工部右侍郎哈鼐祭葬

九月癸卯吏部議准御史田從典奏各督撫於州縣中往往破格  
請調習弊生請嗣後除舊例宜調之缺外其餘概不准濫調嚴  
定督撫違例處分從之○刑部右侍郎常授奏臣等往廣東招撫

海賊賊首阿保位等二百三十七名交納槍礮器械投誠願爲民者安插原籍願爲兵者編入各營下部知之○辛亥 上駐蹕汗特木爾達巴漢昂阿賜來朝諸藩銀幣鞍馬及喀喇沁隨圍官兵銀幣○戊午都察院遵旨察議刑部審訊光棍金眼王五吳謙等打死三人一案旣已遲延又不審出實情又爲解脫應將尙書安布祿等降級調用得旨刑部前審此事明係隱蔽尙書安布祿降三級畱任尙書王士正侍郎陳論俱降三級調用餘依議○己未予故禮部尙書韓菼祭葬○辛酉緩徵山東上年今年額賦及貯德州臨清銀米亦令緩輸○癸亥 上還京師○丙寅吏部議覆江南江西總督阿山奏參給事中許志進爲原任江西巡撫張志棟私人挾仇參臣受原任布政使李興祖等之賄代爲奏畱伏乞嚴究指使人給事中許志進又奏參阿山徇庇原任布政使張

四敎盧崇興等不法事到任四年濫收屬員節禮邳徐賑餉之時縱庇屬員盜買倉穀諸款查阿山被參當靜聽處分乃速將言官  
許奏許志進既知阿山諸款不早奏參乃於阿山許參之後始行  
互訐均屬不合阿山應解任許志進應革職得旨阿山已有旨革  
職畱任許志進狂妄素行亦不端朕另降旨處分○以汪灝爲內  
閣學士由翰林院  
侍讀選○丁卯先是上遣侍衛拉錫等探視河源諭  
之曰黃河之源雖名古爾班索羅謨其實發源之處從來無人到  
過爾等務須直窮其源明白察視其河流至何處入雪山邊內凡  
經流等處宜詳閱之至是拉錫等回奏臣等遵旨於四月初四日  
自京起程五月十三日至青海十四日至呼呼布拉克貝勒色卜  
騰扎爾同臣等起程前行六月初七日至星宿海之東有澤名鄂  
陵周圍一百餘里初八日至鄂陵西又有澤名札陵周圍三百餘

里鄂陵之西札陵之東相隔三十里初九日至星宿海蒙古名鄂敦搭拉登山之至高者視之星宿海之源小泉萬億不可勝數周圍羣山蒙古名爲庫爾滾卽崑崙也南有山名古爾班吐爾哈西南有山名布胡珠爾黑西有山名巴爾布哈北有山名阿克塔因七奇東北有山名烏蘭杜石古爾班吐爾哈山下諸泉西番國名爲噶爾馬塘巴爾布哈山下諸泉名爲噶爾馬春穆朗阿克塔因七奇山下諸泉名爲噶爾馬沁尼三山之泉流出三支河卽古爾班索羅謨也三河東流入札陵澤自札陵澤一支流入鄂陵澤自鄂陵流出乃黃河也除此他山之泉與平地之泉流爲小河者不可勝數盡歸黃河東下臣等自星宿海於六月十一日回程向東南行二日登哈爾吉山見黃河東流至呼托羅海山又南流繞撒除克山之南又北流至巴爾托羅海山之南次日至冰山之西

其山最高雲霧蔽之蒙古言此山長三百餘里有九高峰自古至今未見冰消終日雲霧蔽之常雨雪一月中三四日晴而已自此同行十六日至席拉庫特爾之地又向南行過僧庫里高嶺行百餘里至黃河岸見黃河自巴爾托羅海山向東北流於歸德堡之北達喀山之南從兩山峽中流入蘭州自京至星宿海共七千六百餘里甯夏之西有松山至星宿海天氣漸低地勢漸高人氣閉塞故多喘息謹繪圖呈覽報聞○是月免江南清江等六縣水災額賦有差

冬十月戊辰朔諭內務府郎中齊蘇勒要兒渡東旺西旺等處運河兩邊向來皆沙其隄工係沙土築成故不堅固且又敵數處山水兼之海潮一日二次倒灌所以逼回運河之水不及流行常漲滿溢出於隄者因不能容受之故朕前閱楊村相近有舊河形迹

一道卽於此間建減水石壩以分水勢甚爲有益此處近海疏通甚易所分之水不可使通百靈港寶坻縣香河縣此三處地勢低窪難以抵敵至建造減水壩須口寬四五十丈以石鋪之使尾長而斜堅固修築若水長不至四尺不能越減水壩可將見存舊河形迹挑寬十丈將此土卽築兩邊之隄爾會同直隸巡撫李光地前往驗看丈量具奏○己巳諭大學士等變者要兒渡等處隄岸常被衝決是以朕親臨徧視見楊村西有一引河去海尙近卽欲疏此引河建滾水壩水長開閘使河水入海因需餉浩繁又恐無益故不輕舉朕今遣李光地等往估欲仍開此引河大都天津海潮至時一股向王慶坨一股向楊村逆流故河水漲時卽相觸旁流以致隄岸衝決今將楊村舊引河挑濬建壩自必有益再子牙河廣福樓亦有引河昔開引河時文安大城百姓謂開河於彼有

益而青縣等處則稱開河於彼不便互相爭論皆集河干各控其情及朕諭以挑此引河不獨便於文安大城而青縣亦自無虞民始各退後果兩處皆便○辛未 上御經筵○左都御史李枏以病乞休允之○甲戌諭戶部今歲直隸地方雨暘應候禾稼有秋各郡民生皆獲安恆業惟是去歲山東被災之民自冬月以迄春夏流離轉徙入順天河間境內者甚多於時設廠賑糜所在賑救因而米價至今未減誠恐近畿一路閭井小民拙於生計是宜加恩寬恤用宏休養順天河間二府屬康熙四十四年應徵地丁銀米著通行蠲免該巡撫卽飭府州縣官張示徧諭務俾窮鄉僻壤均沾實惠以副朝廷優軫畿輔黎氓至意○諭戶部山東比年歉收民生饑僅朕焦勞宵旰未嘗晷刻少釋於懷康熙四十一年錢糧既分別減免帶徵又停四十二年徵收蠲四十三年額賦截漕

平糶發帑賑濟遺用多員分道贍養有就食京城者復設廠賚賑  
命滿漢官員資送回籍給以籽粒之需然後民間漸有起色今歲  
幸風雨和調二麥畢登秋禾稔穫流移者悉返里閭復業者咸安  
耕鑿朕於往來山東人員備加詢問深慰於懷但念被災之餘甫  
離重困若非大敷恩澤終不能速底盈甯著將康熙四十四年山  
東省應徵地丁銀米等項除漕糧外通行蠲免務俾通省均霑實  
惠仍牖導小民撙節蓋藏期於比戶皆有餘蓄則於朕惓惓爲民  
經畫之意可以無負矣○諭戶部朕南巡浙江見其農桑徧野戶  
口蕃殖閭閻氣象較勝於康熙三十八年巡幸之時朕心甚慰前  
此屢經蠲貸而車駕經臨應更敷恩寬恤俾民生益加充裕當回  
鑾以後卽擬免康熙四十三年額賦因山東急賑災荒遂爾少緩  
茲直隸各省皆獲有秋康熙四十四年浙江通省應徵地丁銀米

等項除漕糧外著俱行蠲免地方大小官吏仍不時訓誡小民令

各守分節用不論年歲豐歉咸有蓋藏庶無負朝廷殷殷愛養蠲

租給復之至意○己卯以吳涵爲左都御史由吏部右侍郎遷

由吏部右侍郎遷

張睿爲刑

部右侍郎由副都御史遷

由副都御史遷

○庚辰調李振裕爲禮部尚書以徐潮爲戶

部尚書由河南巡撫遷

由河南巡撫遷

○以屠粹忠爲兵部尚書由左侍郎遷

由左侍郎遷

王掞爲刑部尚

書由吏部左侍郎遷

由吏部左侍郎遷

○辛巳予故原任兵部左侍郎楊雍建祭葬○癸未

諭大學士戶部尚書等戶部呈樣之斛與升斗朕俱注水詳加測

量其樣升上下四角寬窄不勻算積數見方得三萬一千三百八

十一分有零其樣斗上下四角寬窄亦不勻算積數見方得三十

一萬六千七百六十四分有零其樣鐵斛算積數見方得一百六

十萬分其數不相符查性理大全嘉量篇第十二內每斛積一百

六十二萬分與今之鐵斛校多二萬分因鐵斛用之已久不可輕

改是以依今之鐵斛五斗爲準造新樣斗一具方徑八寸深五寸  
積數見方得三十二萬分又造一新樣升一具方徑四寸深二寸  
積數見方得三萬二千分若依此樣十升一斗五斗一斛毫釐不  
差諭畢因出新樣銅斗升付戶部堂官等曰照式以鐵爲之○乙

酉轉姜構爲吏部左侍郎以李錄子爲吏部右侍郎

原任禮部右侍郎

轉王九齡爲兵部左侍郎以梅鋗爲兵部右侍郎

由福建巡撫遷李斯義爲

左副都御史

由大理寺卿遷

○丁亥以赫壽爲內閣學士

由內閣侍講學士遷

子以趙宏燮爲河南巡撫

由山西布政使遷

○己丑九卿等議覆四川陝

西總督博霽奏請於三門及汾渭賈魯等河運米事應交與河道  
總督張鵬翮查議具奏 上諭大學士等曩者賑濟陝西災荒曾

交總河靳輔由河南運米靳輔將運米河名及沿途地名詳開指  
奏與黃河不相關涉另從一河道運之想卽是今徐潮所查之河

如挑通此河其利無窮無事之時雖不甚緊要儻至有用之時誠

不易得也此河與黃河無涉何必交總河該部另議具奏尋工部

議覆汾河渭河賈魯河著各該撫設法挑濬從之○庚寅以范時

崇爲山東布政使

由福建按察使遷

○辛卯

上聞永定河啟鑿○壬辰

以程文彝爲工部右侍郎

由左僉都御史遷

李斯義爲福建巡撫

由副都御史

遷○內閣學士李鍾以病乞休允之○癸巳

上臨閱齊蘇勒等

所勘詳家莊擬築減水壩之處論大學士等此處迎瀋頂衝若築

減水石壩遇水漲時石壩雖不妨而兩邊土壩可虞見在河勢南

岸露出磯觜北邊暗被衝刷今已近北岸矣朕向巡幸西塞之外

見黃河一邊露出磯觜則一邊必然衝刷水性原如此朕故知之

此處斷不可築減水壩也因問之士民皆云三十年前河流原近

南岸眾皆驚服○丙申 上駐蹕南苑○轉李錄予爲吏部左侍

郎調王九齡爲吏部右侍郎

由兵左調

○以陳說爲左副都御史

由大司理寺

少卿蓬

○予故原任戶部侍郎田雯祭葬

十一月丁酉朔日有食之○戊戌諭大學士等明歲春間正青黃不接之時當自正月爲始於京師及通州地方發倉米照今年例平糶爾等會同戶部議奏○己亥諭欽天監初一日日食朕用儀器測驗午正一刻十一分初虧未初三刻二分食甚申初一刻復圓查七政麻未初三刻二分日月合朔新法推算必無舛錯之理這舛錯或因誤寫字畫或因算者忽畧將零數去之太多亦未可定著詳察明白具奏尋欽天監監正常額等以推算未盡請罪上從寬免之○辛丑以黨居易爲福建按察使

由江南驛陞道遷

○壬寅

以蔡升元爲內閣學士

由詹事遷

○癸卯刑部奏覆朝審案件

上諭

大學士等觀今年秋審朝審外省罪犯議出者少京城罪犯議出

者多用法豈可如是原任工部郎中費仰嘏於內外河分司之事  
不但侵蝕帑金凡諸弊端皆專擅而行諸大臣既不肯以此人應  
正法之處公同奏請反謂之情罪可矜朕今斷不寬宥凡人出身  
爲筆帖式卽思盡忠效力日後始可用爲大臣費仰嘏各處差遣  
惟知貪賄竟不爲國家效力如畱此等人將於何處用之費仰嘏  
著改情實○己酉轉梅鋗爲兵部左侍郎以曹鑑倫爲兵部右侍  
郎由內閣學士遷○辛亥吏部議覆四川巡撫能泰奏行取知縣請停其  
督撫保奏但將無錢糧盜案者一概行取引見候用應不准行  
上諭大學士等覽能泰此奏其中大有深意保奏行取知縣時不  
能無請託之弊且知縣等雖居官甚好若有錢糧盜案不便行取  
錢糧盜案之有無皆注在部冊可查嗣後督撫保奏之例著令停  
止卽令該部於無錢糧盜案知縣內論俸每省行取三四員如此

則可塞知縣奔競之路但伊等俱補用言官所繫緊要俟行取到日再應詳察用之爾等可以此問九卿尋九卿遵旨議覆嗣後行取知縣不用保舉每省限定額數照部冊較俸行取從之○陝西總督博善奏參涼州總兵官魏勳年老 上諭大學士等魏勳於軍前甚有勞績兵民亦皆愛戴此等人材今西陲亦復有幾如果年邁令具呈請休可也何必奏參原本發回又諭魏勳及師帝賓麥良璽俱係舊臣詎可輕言參劾前者佛倫任總督時亦欲參師帝賓曾面奏朕前朕不之許如此等人若皆劾而罷之恐其餘寒心設有任用之處若等俱非易得者也提督潘育龍亦好武臣中一介不取操行俱全者實難得之但不犯法不貪冒卽已矣且本朝邊疆武臣在地方不生一事與文臣同心效力兵民協和誠爲自古所少今經歷軍陣之大臣已漸零落至於海戰又不得

比於江湖今知海戰之法者亦少矣此可不留意乎○戊午諭大學士等凡人皆當立品筮仕之初卽思干請於人其立意如是則他日將何所望哉儻自爲筆帖式之日卽有急公盡力之心何憂其不終致大位或有未仕之先早已債負盈積至入官後若不殷民何以償之國家名器豈爲此輩償債設乎朕於滿洲蒙古漢軍漢人視同一體善者卽稱之爲善若治罪一概不恕也○禮部議覆朝鮮國王李焞將其國越境殺人金禮進等擬立斬該管人員擬革職流徒具奏應如所請 上諭大學士等覽朝鮮國王奏章其所議甚爲敬慎周詳越境殺人者依該國王所議正法固其宜也其餘罪犯內尙有當恕者爾等可再酌原宥議奏凡外國之事輕忽者多處置少有不當卽不能以服其心所關甚大朕必慎之而又慎焉○天津總兵官藍理奏請於天津等處開墾水田 上

諭大學士等昔李光地請於直隸地方開墾水田朕以爲水田不可輕舉者蓋北方之水難於積蓄初任之官但當雨水有餘時見水之大遂以爲可種水田不知驟長之水卽濬溝引入其涸固甚易也觀琉璃河莽牛河易河之水入夏皆涸則可知矣北方水土之性迥不同於南方朕往者西巡見晉省太原以南引水自高處灌入田中甚爲得法陝西甯夏哈密等處亦皆如山西種水田此皆按地方之形隨水土之性而作者也天津沿海斥鹵地方又非民田今藍理請開水田著交部議奏○湖北巡撫劉殿衡以刷印御書並藏書樓圖呈覽 上諭大學士等湖廣省捐工建樓殊屬糜費凡車駕巡幸之處一切需用從不取辦於民而各省不肖官員指稱修行宮供備器物並建造御書碑亭等項名色輒行動用正項錢糧借詞捐還究無償補及至虧空數多復加倍私派科

歛肥己以致重貽小民之累種種弊端不可勝指嗣後著嚴行禁  
止○以汪霤爲內閣學士

由詹事遷

○禮部遵旨將朝鮮國越境殺人

案內該管官員分別原宥具奏 上諭大學士等內地被殺之人  
皆偷採人獵者非良民也卽爲內地擒獲亦當從重治罪但朝鮮  
國人越境而來殺人行劫法所必不可宥應將金禮進等立斬其  
該管官員當寬以處之李有白等俱從寬免罪朴錫昌等俱革職  
從寬免其流徒○諭徐潮爲河南巡撫居官實好平易得體民無  
不稱頌之者朕西巡時經河南見州縣司道官內有衰老者朕卽  
酌量革退徐潮亦少過寬耳觀李光地近日聲名較前稍減彼每  
被人欺誑大凡爲督撫者一被人欺誑則權必旁移張鵬翮向有  
清名在河工亦甚效力但被屬員王謙等欺誑耳身雖不要錢子  
姪親戚在外指名取錢可謂自己不取耶爲大臣者約束不嚴自

謂己不知之諉之他人可乎○諭朕嘗閱史書自古大臣得始終善全者少朕今御極四十餘年大學士衛周祚馮溥杜立德李霨宋德宜王熙等俱得全功名而考終命者皆朕極力保全之所以也朕從不多生事但穆然清靜處之以和平故諸臣皆得享其福也○諭明史關繫極大必使後人心服乃佳宋史成於元元史成於明其中是非失實者多是以至人心不服有明二百餘年其流風善政誠不可枚舉今之史官或執已見者有之或據傳聞者亦有之或用稗史者亦有之任意妄作此書何能盡善孔子聖人也猶言知我者其惟春秋乎罪我者其惟春秋乎孟子又言盡信書則不如無書當今之世用人行政規模法度之是非朕當自任無容他諉若明史之中稍有一不當後人將歸責於朕不可輕忽也是以朕爲明史作文一篇爾等可曉諭九卿大臣

御製文曰

朕四十餘年孜孜求治凡一事不妥卽歸罪於朕未嘗一時不自責也清夜自問移風易俗未能也躬行實踐未能也知人安民未能也家給人足未能也柔遠能邇未能也治臻上理未能也言行相顧未能也自覺愧汗何暇論明史之是非乎況有明以來二百餘年流風善政豈能枚舉其中史官舞文杜撰顛倒是非者概難憑信元人修宋史明人修元史至今人心不服議論多歧者非前鑑耶朕實無學每讀朱子之書見相古先民學以爲己今也不然爲人而已之句罔不心悅誠服又讀孟子盡信書則不如無書益見史官上古不免訛傳況今人乎班馬異同左國浮華古人以爲定論孔子至聖作春秋有知我罪我之歎後世萬倍不及者輕浮淺陋妄自筆削自以爲是朕觀凡天下讀書者皆能分辨古人之是非至問以時事人品不能一字相答非曰從來不與人往來卽

曰不能深知夫目前之事作官之道尙茫然不知而於千百年前無不洞悉何得昧於當世而明於論古豈非遠者明而近者闇乎所以責人重者責己輕君子不取也明史不可不成公論不可不採是非不可不明人心不可不服關繫甚鉅條目甚繁朕日理萬幾精神有限不能逐一細覽卽敢輕定是非後有公論者必歸罪於朕躬朕不畏當時而畏後人不重文章而重良心者此也卿等皆老學素望名重一時明史之是非自有燭見卿等眾意爲是卽是也刊而行之偶有斟酌公同再議朕無一字可定亦無議見所以堅辭以示不能也○是月免湖廣武陵廣東南海等七縣衛被災額賦有差

十二月丁卯朔調鄭昱爲安徽布政使以何顯祖爲四川布政使由湖北按察使遷○以侯居廣爲福建按察使由四川川東道遷○壬申以布爾

賽赫由俱爲左副都御史

俱由郎中遷

○戊寅

上幸南苑行園○己

卯禮部議淮湖廣學政潘宗洛奏湖廣各府州縣熟苗中有通文

義者惟與漢民一體應試從之○癸未予故原任禮部尚書杜臻

祭葬○乙酉以徐櫬爲湖北按察使

由江西道遷

○戶部議淮天津

總兵官藍理奏直隸沿海曠地豐潤寶坻天津等處窪地可倣南

方開爲水田栽稻一二年後漸成肥沃臣願召募閩中農民二百

餘人開墾一萬餘畝儻可施行召募江南等處無業之民安插天

津給與牛種將沿海棄地盡行開墾限年起科又臣標兵皆依前

朝屯衛之制入籍力田亦可以節省兵餉從之○丙戌以河工告

成加河道總督張鵬翮太子太保餘加級給獎有差○予故吏部

左侍郎姜楠祭葬○戶部等部議淮湖廣總督喻成龍奏紅苗歸

化應將辰沅靖道移駐鎮筭添設同知通判巡檢吏目等員專理

苗務歸辰沅靖道轄嗣後武職不許干預苗犯輕罪者聽土官發落犯命盜重罪者土官拏解道廳審明擬罪五寨司土官應聽廳官管轄地方有逃盜之事土官一併處分將麻陽縣儒學訓導移駐五寨司就近訓導五寨司等處設立義學聽苗民肄業苗寨有互相仇殺視其聚眾多少並該管土官俱分別治罪從之○戊子上還宮○甲午以御製詩集賜羣臣○是歲朝鮮來貢○人丁戶口二千四十一萬二千三百八十田地山蕩畦地五百九十八萬七千一百九十六頃六十二畝有奇徵銀二千七百四十一萬六百六十八兩有奇米豆麥六百九十七萬一千一百二十二石有奇草二百八萬一千六百九十三束茶十五萬七千四百八十五引行鹽四百三十一萬九千四百七十六引徵課銀二百六十九萬七百二十九兩有奇鑄錢二萬三千八百六萬五千九百

有奇

臣王先謙敬編

臣周潤蕃恭校

康熙四十四年乙酉春正月戊午賜諸王大臣及官學古文淵鑑  
○諭吏部戶部兵部工部前黃河之水往往倒灌清口者皆由仲  
莊閘與清口相對駱馬湖水勢湍急遂逼黃流灌入清口朕視河  
時躬臨相度命河臣移仲莊閘改建於楊家莊出口工竣之後河  
臣報稱黃水暢流入海絕無倒灌清口之患朕尙未經親閱今欲  
特派其地察驗形勢用籌善後之規其中河黃河運河有應加修  
防者亦隨宜指示以圖經久至於山東省薦饑之民賴兩年來極  
力賑贍繼以有秋幸皆得所其民間生聚果否殷阜並於沿途親  
行周覽焉○庚申以常舒爲理藩院尚書調希福納爲吏部右侍

郎由盛京戶部侍郎調

○癸亥 上幸湯泉駐蹕○是月免湖北京山縣上

年水災額賦十之三

二月乙丑朔 上還宮○丁卯河道總督張鵬翮奏請修理徐州城外隄岸得旨徐州逼近黃河城外石隄工程甚屬緊要著卽行修理○以法特哈爲盛京戶部侍郎由大理寺卿遷○壬申諭大學士等昨御史黃秉中條奏行取知縣卽以科道用似爲太過此言頗當滿洲漢軍俱從郎中員外郎始升科道漢人則以行取知縣卽升實屬不均爾等將黃秉中條陳交九卿議奏○癸酉 上南巡啟鑾○辛巳諭大學士等原任刑部右侍郎勵杜訥向在南書房效力二十餘年爲人敬慎積有勤勞並無過譴其品級雖不及予謚之例曩者原任侍郎沈荃曾經予謚今勵杜訥亦著賜謚爾等會同禮部議奏尋予謚文恪○壬午 御舟泊靜海遣官奠刑部侍

郎勵杜訥墓○丙戌 上入山東境山東紳衿軍民數十萬執香跪迎道左合奏山東連年饑饉蒙 皇上截畱漕運分疆散賑動內帑數百萬兩遣官四五百員分派各州縣賑濟至地丁錢糧前後屢行蠲免通省億萬民命始得復生無不垂涕感激 御舟已過猶瞻仰不已焉○庚寅諭大學士等總河張鵬翮昨日來問以河工形勢河事已大治矣從前駱馬湖口設竹絡壩湖水大則從壩流入黃河河水大則溢流入壩內今竹絡壩止有湖水暢流黃水並無浸灌則黃水之深通可知初次到江南時船在黃河兩岸人煙樹木皆一一在望康熙三十八年則僅見河岸四十二年則河去岸甚低是河身日刷深矣自此日深一日豈不大治聞下河連年皆大熟亦從前所未有所也又諭朕不意山東之民速能如此前者南巡見閭閻失所不堪屬目今服飾顏面大異往時聞各官

賑養亦善此由承平日久國帑富饒故能蠲數年錢糧遣官贍養賑濟耳凡罹災荒儻豫行奏報無不可賑救者止因山東各官匿災不報故大致饑饉向日陝西饑荒亦由於匿不報聞朕曾以地方官匿災不報之故詢之於民皆言民一罹災朝廷卽蠲歲賦賦一蠲則火耗無徵故地方官隱而不報也自古弊端匿災爲甚誠豫爲奏報卽設法賑濟矣民豈遂至饑饉耶○命募民墾湖北荒地無力者官給牛種○壬辰子故原任左都御史李柟祭葬○甲午 御舟泊濟甯浙江巡撫張泰交以浙民望幸奏 上允其請三月己亥諭山東巡撫趙世顯朕爲兩河告成特來巡閱道經山左見民生自去歲休養之後漸有起色朕心甚慰夾岸黃童白叟懼呼載道感恩叩謝者日有數十萬今仲春之時麥苗未長未致妨農儻回鑾之際正值農忙麥秀恐妨稼穡爾卽曉諭百姓概免

叩謝各務農事可也○庚子 上入江南境江南紳衿軍民夾道跪迎奏稱 皇上軫念萬民罹於水患屢臨河上指示修築黃淮方略故能不告成功永無衝決之虞今復謀及萬全務期善後不憚跋涉之勞爲小民閱視河道亘古未有感恩叩謝歡聲雷動○  
壬寅 御舟渡黃河閱楊家莊隄閘○乙巳 上駐蹕揚州諭河道總督張鵬翮河工已經告成善後方略更爲緊要朕今親臨閱視修建天妃閘甚當儻黃水長至五六尺清水不長勢弱不敵黃水自然倒灌亦必至之理豈可因此卽謂治河失策乎若遇倒灌卽將天妃閘暫時下板蓄清水分力敵黃不過數日黃水卽退遇糧船過時卽起板開放若黃水不灌入不必下板其惠濟祠一帶雖建有石工但運河與黃河止隔一綫之隄若黃滔衝刷石工恐不足恃著於上下適中之處相度形勢修建挑水壩三四處挑

潘開行其王公隄亦應相度形勢修建挑水壩運河東隄保守最  
爲緊要隄岸應行加幫高郵迤南湖河水勢相平界首迤南河水  
高於湖水東西兩岸卑薄應加幫修著量建石工淮安近城隄岸  
卑薄之處亦應相度形勢修建石工黃河南岸隄工關繫緊要應  
加謹修防至於直隸山東河道與總河相距甚遠應照河南例各  
交與該省巡撫就近易於料理其楊村通判並無經管之事應行  
裁去爾會同行在九卿速議以聞○丁未河道總督張鵬翮會同  
行在九卿遵旨議覆淮黃兩河形勢黃水漲時勢必倒灌彼時惟  
應遵旨暫下天妃閘板蓄清水之力以敵黃若黃水不倒灌則不  
必下板至糧艘過卽當啟板開放其惠濟祠一帶隄岸淮黃夾流  
之處所關甚鉅亦應遵旨於扼要處酌量建挑水壩三四處至王  
公隄亦應建挑水壩保守運河東岸之隄最屬緊要應遵旨加幫

界首迤南東西兩岸之隄及淮安近城隄岸卑薄處應建石工者  
量建石工至於直隸山東河道一應工程事務照河南例各交與  
該省巡撫就近料理其楊村通判並無經管事務應裁從之○以

由直隸巡道遷

○辛亥

上駐蹕蘇州蘇民數萬

人以恭逢

萬壽節羣跪行宮前奏進食品得旨朕因閱視河工

巡訪風俗而來非爲誕辰也且朕來時一切應用之物俱備自內

府所過地方秋毫無犯今爾兆民中心篤至朕已知之卽如朕受

之矣爾等可攜去午時

上御行宮召河道總督張鵬翮及河工

官員入諭曰今河工雖已告成不可不豫爲修理防護以圖善後

之策朕見淮揚一帶隄岸卑薄未甚堅固儻不加保護以致衝決

則淮揚地方百姓何以能堪爾等宜急籌之張鵬翮奏曰 皇上

指示誠然臣當竭力以圖保守 上諭朕至清口見黃水倒灌因

以問爾爾赧然不能答反稱不曾倒灌此卽爾大臣毫不認錯處爾居官雖好卻爲王謙張弼所欺王謙之劣迹河官及庶民盡皆知之爾獨特加信用李光地居官亦好但聽信楊名時虛飾道學之言往往誤事且惑於朝琦諸事聽從人皆稱朝琦爲小巡撫凡督撫薦人初薦一二可用者後則不稱大約爾等用人皆多偏倚十室之邑必有忠信漢人內有優者則旗員內無一優者乎朕於旗下漢人視同一體善則用之不善則懲之爾等每有私心故多徇庇頃令河工應追錢糧著侈世祿王謙張弼均賠部議甚明爾又奏請欲免其追賠開捐納以補原項此特因王謙亦在數中故希圖脫免賠補耳明係徇庇爾復何辭張鵠翮不能對又諭爾自謂居官清廉一介不取若謂一介不與爾則有之一介不取則未必然取與不取惟爾自知之卽司道官之耳目誰能盡

掩爾乃講道學之人道學以無私爲本內有私則外行盡屬虛飾  
曩者直隸年歲少歉原任巡撫沈朝聘曾奏民食粗糲故臣亦食  
粗糲朕謂沈朝聘曰爾之食粗糲者不過在百姓面前耳若在署  
中豈亦然耶卽果食粗糲不能有濟民生亦何益哉往往有人動  
輒告天自稱無私若果無私天自知之何告之有其告天者卽私  
也朕見爾標下兵丁並無勸賞久疏操演以致隊伍不齊軍容不  
振兵可百年不用不可一日不備兵旣如此儻至用時何堪驅策  
與其徒充虛目糜費錢糧不如卽奏請裁汰王應統先任利民路  
參將時鈐束兵丁尙有可觀及補授爾標下副將習成怠斂後升  
懷慶總兵官軍務遂廢弛矣爾之兵丁經年不曾訓練無非爲節  
省計耳然有當節省者亦有不當節省者果當節省者朕亦嘗節  
省至於應蠲應賑及應恩賞之處朕曾不惜數百萬金此天下人

所共知也至目下河工不可卽謂之成俟一二年後方知爾須盡心籌畫爲善○諭江南江西總督阿山等內廷供奉諸翰林雖皆善書但朕勤心典籍卷帙繁多見在供奉人員繕寫不給爾等出示傳諭安徽江蘇舉貢生監等有精於書法願赴內廷鈔寫者赴爾等衙門報名至浙江亦照此傳諭朕親加考試○甲寅賜扈從大學士馬齊等皇輿表○己未上駐蹕松江○辛酉閱江甯松江各標官兵射○壬戌諭提督江南學政張廷樞朕比臨幸松江道經青浦據該邑貢監生員孫鋐等奏稱青浦之北地名孔宅自漢時至聖苗裔避地至此奉至聖衣冠環璧葬焉懇請頒賜匾額朕念孔子乃萬世之師既有遺迹亟宜表彰因於萬幾之暇親書聖述遺徵匾額以示尊崇先師之意可選良工摹刻懸挂○諭大學士等原任禮部侍郎高士奇在內廷供奉有年其品級不應予

謚朕軫念舊臣原任刑部侍郎勵杜訥已照侍郎沈荃例子謚今  
高士奇亦應予謚以示特恩爾等會同禮部議奏尋大學士等會  
同禮部擬謚請旨得旨高士奇著謚文恪○諭江南江西總督阿  
山江蘇巡撫宋犖朕爲兩河告成楊家莊新河建閘特來閱視爾  
等同地方士民再四懇請故渡江而南見百姓雖不能比戶豐饒  
幸安居樂業無憔悴之色朕心少慰矣編氓皆朕赤子休息培養  
已數十年民雖至愚亦所深悉所以扶老攜幼日計數萬隨舟擁  
道歡聲洋溢者皆由中而發非假飾也但人多路隘菜蔬苗麥瀰  
漫田野不能保其無損朕甚惜焉爾等卽出示曉諭萬勿踏壞田  
禾有負朕恤民之意

夏四月丙寅 上駐蹕杭州○戊辰閱杭州官兵射○己巳諭大  
學士等原任翰林院侍讀徐倬年逾八十學問淵博可特授禮部

侍郎銜以示優獎之意○庚午諭福建浙江總督金世榮浙江巡撫張泰交福建巡撫李斯義朕車駕臨幸之地必大沛膏澤下逮黎元而各省錢糧屢次遞蠲浙江本年地丁銀米又經全免無可加恩惟是刑獄爲民命攸關朕每當重罪奏讞之時常深矜恤今乘輿所至父老子弟夾道歡迎而身陷囹圄之人自新無路朕甚憫焉浙江福建兩省康熙四十四年四月初八日以前凡罪犯詔款不應赦者不赦外其餘死罪以下已發覺未發覺俱著減等發落康熙四十三年秋審奉旨監候緩決者一併減等發落仍開具人數奏聞爾等其體朕爲民巡省布德好生之意卽詳慎察明遵行○癸酉 上回鑾○甲戌以金培生爲四川按察使由陝西潼商道遷

○戊寅 御書至德無名額懸吳泰伯廟○己卯 御書濟時良相額懸范仲淹祠堂讓德光前額懸吳季札廟坡仙遺範額縣蘇

軾廟○乙酉

上駐蹕江甯○丙戌遣尚書徐潮祭明太祖廟○

己丑命安徽江蘇人犯照浙閩例康熙四十四年四月二十六日

以前死罪以下俱減等發落○閱江甯官兵射○

御書兩江道

愛額縣原任江南江西總督傅拉塔祠堂諭江南江西總督阿山

等朕昨往雨花臺見原任總督傅拉塔祠堂傅拉塔居官甚好其

參劾之人雖多總無怨者大有氣節實心效力朕因是特書匾額

賜之爾等刊畢可親懸其祠堂此匾額之字宜善加封裹給與其

子○諭江南江西總督阿山曰江西巡撫李基和甚爲粗鄙不知

禮節帶往京師學習浙江布政使郎廷極人材優長可署江西巡

撫卽作速行文郎廷極令其卽行赴任○庚寅

上自江甯府啟

行至明太祖陵導引官引向中門 上命自東角門入曰此非爾

等導引有失特朕之敬心耳旣入率諸皇子及大臣侍衛等行禮

○辛卯

上駐蹕金山江天寺

○壬辰

上御行宮門外內大臣

侍衛內閣部院大臣翰林及江南文武等官皆侍立諭河道總督

張鵬翮爾前因衝決時家馬頭參佟世祿一案於阿山徐潮勘奏

後具奏強辨爾又請開河工捐納抵補事例明係脫卸屬員王謙

等凡人既讀書先要辨明公私二字凡事從公起見方可以服人

爾之名節關繫固重佟世祿之身家關繫獨不重乎王謙爲人刻

薄人人怨憾爾卻偏信任其恣意妄行以致人心不服爾常云非

堯舜之道不敢陳於主前如此行事豈得謂堯舜之道朕非不知

爾在河工能任勞苦但聽信屬員流於刻薄從來大儒持身接物

當如光風霽月爾平時亦講理學乃一味苛刻嚴厲豈所謂光風

霽月乎况大臣受朝廷委任必須爲國爲民事事皆有實濟若徒

飲食菲薄自表廉潔於國事何益耶○癸巳 御書理明太極額

懸周敦頤祠堂忠節不磨額懸陸秀夫祠堂寶晉遺蹟額懸米芾  
海嶽菴山高水長額懸焦先祠忠蓋永昭額懸宗澤廟○乙未刑  
部奏原任吏部郎中陳汝弼原任溫處道黃鍾行賄作弊俱擬絞  
監候 上曰人有薦陳汝弼之賢能者故朕簡於眾郎中內特授  
選司郎中宜持身廉潔奉職敬慎而反侵偏堂官陵辱同輩凡事  
專擅率意恣行驕縱狂妄已極負朕眷待之恩有玷擢舉之意如  
受賄是實卽應置之於法以爲眾戒若未經受賄則彼無罪亦應  
寬之著議政大臣九卿詹事科道會同再行嚴加確審定擬具奏  
聞四月乙未吉林烏喇將軍宗室楊福奏請吉林烏喇白都納等  
處動支庫銀買馬給兵丁牧養 上曰此事不准行朕屢以太僕  
寺之廠馬並茶馬賞給京師兵丁及各處駐防兵丁所以兵丁無  
賠馬之苦歷觀宋明之時議馬政者皆無善策牧馬惟口外爲最

善今口外馬廠孳生已及十萬牛有六萬羊至二十餘萬若將如許馬與牛羊驅至內地牧養卽日費萬金不足口外水草肥美不費餉而馬畜自然孳息前巡行塞外時見牲畜彌滿山谷間歷行八日猶絡繹不絕也○丙申 御書正誼明道額懸董仲舒祠經術士額懸胡安國書院賢守清風額懸平山堂○癸卯 上登陸幸高家堰徧閱河隄諭河道總督張鵬翮曰康熙四十二年朕臨閱高家堰時爾奏石隄可於八九月間告成今已三年尙未完工萬一大水奄至恃此草埽詎能禦之張鵬翮奏曰必能保固斷然無害 上諭曰草埽俱經二三年矣腐爛沈塌者多猝遇大水事難豫料如不謹慎修築被水衝決枉費錢糧姑置勿論但去年已奏河工告成今年又奏衝決其謂之何爾須日夜謹守保護夫治河莫要於得人觀爾所用之人每多有失豈可倚任此輩分守

此隄耶爾等惟見清口之水流出卽以爲功成不思防禦儻高家  
堰六壩之水泛溢則清水力弱而黃水必復致倒灌矣高家堰所  
關緊要宜謹誌之毋忽 上幸惠濟祠閱隄畢卽坐於隄上諭大  
學士諸大臣及河臣等曰朕留心河道親閱者屢矣河之形勢必  
身厯其地始知成功之次第朕每至河上必到惠濟祠以觀水勢  
康熙三十八年以前黃水汎濫凡爾等所立之地皆黃水也彼時  
自舟中望之水與岸平岸之四圍皆可遙見其後水漸歸槽岸高  
於水今則岸之去水又高有丈餘清水暢流逼黃竟抵北岸黃流  
僅成一綫觀此形勢朕之河工大成矣朕心深爲快然○乙巳諭  
河道總督張鵬翮惠濟祠前植標杆處可建挑水壩祠後埽灣處  
亦宜建挑水壩以保淤灘但此二處挑水壩俱不宜太長恐逼水  
盡向北岸有礙楊家莊口門至卞家汪舊壩修建甚佳再略加寬

長更善○丙午 上登陸閱視黃河九里岡諭河道總督張鵬翮  
河工積弊汎官利於隄岸有事修建大工得以侵冒河帑又希圖  
修橋建閘興無益工程於中取利著嚴飭各官痛改前非加謹修  
防儻有故違定行正法以示懲戒其地方有司官員漠視河工致  
有貽誤者爾奏參到日將地方官亦行正法河官平時須豫備物  
料以爲不時修防之需若物料不備遇工程險要倉皇無措雖將  
該管官重處亦屬無濟又諭九里岡隄工修理得法不似從前直  
埽不能挑溜今修魚鱗埽逐段挺出偏溜開行使窪處漸淤此處  
甚善其埽工釘樁處可再建挑水埽二座若恐水淺則先建磯觜  
埽形出水俟其埽下漸淤層次加修則料不加多而功易成○庚  
戌以穆丹爲戶部右侍郎由詹事遷○癸丑命山東照江南浙閩例死  
罪以下囚俱減等發落○甲寅 御舟泊故城縣娘娘廟諭河道

總督張鵬翮山東運河轉漕入京師關繫緊要不可忽略朕來時  
閱視隄岸不堪今回鑿時計期兩三月而隄工修理甚屬堅固嗣  
後當照此加謹修理不可因朕已經閱過致有懈怠爾宜識之運  
河各閘照依漕規啟閉有官員經過不許徇情擅自開放洩水以  
致漕船稽遲違者朕決不宥○乙卯 御舟過景州之安林諭河  
道總督張鵬翮河工關繫緊要朕閱視已畢爾卽自此回任至河  
標兵丁多而無用著畱一千名其餘一千六十一名俱裁去○丙  
辰以舒蘭爲內閣學士由內閣侍讀學士遷○辛酉 上還京師○壬戌調  
侯居廣爲四川按察使金培生爲福建按察使

五月乙丑議政王大臣九卿遵旨覆審原任吏部郎中陳汝弼一  
案擬陳汝弼立絞黃鍾仍照前擬絞監候 上曰陳汝弼並不招  
得財卽擬正法人心豈服聞此事左都御史舒輅獨擅行之又聞

陳汝弼曾出私書三封並不察訊此係何故召議政大臣領侍衛內大臣侯巴渾德等入問之巴渾德等奏曰陳汝弼雖出私書三封因無甚情弊故未寫入奏內鞫審時三法司官員取供舒輅復加改削 上曰朕所聞不爽其緣事者及審事大臣官員著於初六日早俱集暢春園朕將親鞫之○戶部奏茶馬差員應撥官吏替得旨茶馬事務不必差官著甘肅巡撫兼管○丙寅諭大學士等李基和自江西糾道浙江又徑住蘇州不前進迎駕不敬殊甚且問以地方諸事一無所知大玷厥職著革職拏問嚴行擬罪具奏又諭戶部侍郎庸愛王紳居官貪墨著革職副都御史傅作楫爲人狂妄聲名甚劣著革職安插奉天○丁卯召議政大臣大學士九卿入問曰爾等議陳汝弼之事擬以死罪以何爲據禮部尙書席爾達奏曰陳汝弼雖未招認黃鍾親書口供及其家人口供

甚明因坐之罪刑部尙書安布祿奏曰曾以黃鍾親書口供及其  
家人口供俱示陳汝弼陳汝弼不對因坐之罪左都御史舒輅奏  
曰陳汝弼見黃鍾口供及其家人口供並無一言有招認形狀因  
坐死罪臣等意見不到不能明晰有何辦處 上曰朕所委者乃  
人命攸關之事爾云意見不到則必何事爾方見到耶召陳汝弼  
入問曰爾事若何一切俱應實奏陳汝弼奏曰臣無辜抱屈總不  
出 皇上睿鑒之中更復何言 上曰明係爾辦事有失豈可言  
無辜抱屈專主此事之堂官司官爲誰陳汝弼奏曰三法司堂司  
官公同鞫審無專主者 上命陳汝弼出令侍衛吳什楚宗侍衛  
穆和倫等問黃鍾爾口供招認顯然今尙有何辦處黃鍾供稱一  
日之中來訊六次兩足俱折因銜冤親書供招是實侍衛吳什等  
以黃鍾供詞回奏 上命刑部侍郎常授取黃鍾親書口供及陳

汝弼出首王原等屬託私書三封閱畢謂常授曰陳汝弼並無口供卽擬以罪而汝無一言何也又諭大學士等曰此事除前審三法司堂官外著交議政大臣及九卿再審具奏○庚午吏部奏原任大學士吳璵員缺開列請旨得旨舊例大臣病故必俟其靈柩回籍方請補授乃眷念大臣之意也今大學士吳璵身故尙未發引何亟亟乃爾本著發還○壬申諭大學士等朕頃者南巡見直隸山東兩省販私鹽鑄私錢者甚多此二事大不便於民傳諭該部嚴行禁止○癸酉轉穆丹爲戶部左侍郎以巴錫爲戶部右侍郎由雲貴總督遷○以姚諧爲安徽按察使由山東東兗道遷○乙亥轉范承烈爲戶部左侍郎以汪震爲戶部右侍郎由內閣學士遷○以汪晉徵爲左副都御史由順天府尹遷○戊寅議政大臣九卿遵旨再審原任郎中陳汝弼一案查陳汝弼雖未受賄但有錯用黃鍾之處應議處已

經革職無庸議將原審三法司堂司官分別議處具奏得旨舒輅  
王原等著革職勞之辨李先復顧汎赫申馬希爵塔進泰著各降  
三級調用安布祿卞永譽常授著各降三級敦拜傅繼祖常舒王  
拔吳涵著各降二級俱從寬畱任餘依議○倉場侍郎辛保緣事  
革職○己卯諭官員薦舉卓異關繫激勸大典所列事蹟期有實  
濟於地方百姓開載虛文無益嗣後薦舉卓異務期無加派無濫  
刑無盜案無錢糧拖欠無虧空倉庫銀米境內民生得所地方日  
有起色方可膺卓異之選其他所開虛文俱不必入可會同九卿  
定議具奏○予故保和殿大學士吳璵祭葬謚文端○庚辰以貝  
和諾爲雲南貴州總督由兵部右侍郎遷○辛巳諭大學士等嗣後蠲免  
新年錢糧如並免積欠則帶徵俱免如止蠲本年錢糧無免舊欠  
之旨則所有舊欠錢糧俱於次年徵收蠲免之年概不得開徵承

著爲例○大學士等遵旨覆奏臣等將卓異官填注款項問九卿據云 聖諭誠然卓異官員原不應填注虛辭但應注不虧空倉庫錢糧地方無盜賊省刑罰數條 上曰著照此永遠爲例○以張廷樞爲內閣學士由翰林院侍講學士遷○乙酉以滿闢爲兵部右侍郎由內閣學士遷○丙戌 上巡幸塞外啟鑾○是月免江蘇吳縣臨湖坍地逋賦

六月甲午以原任江西巡撫張志棟爲大理寺卿○以管竭忠爲浙江布政使由貴州按察使遷○吏部議覆御史黃秉中奏漢人由知縣厯俸三年卽准考選科道似覺太驟嗣後應將行取知縣到部引見後以各部主事挨班補用遇考選時方准考選至初任之中行評博亦俟伊等升任後始准考選科道考選時將正途出身之六部郎中員外郎主事中行評博及翰林院編修檢討一同開列聽

候簡用從之○戊戌以趙世芳爲工部右侍郎

由內閣學士遷

魯湖爲內

閣學士

由盛京禮部理事官遷

○癸卯以阿琳爲貴州按察使

由福建道選

○

丙午以彭會淇爲內閣學士

由少詹事選

○停廣東開礦○癸丑予故

工部右侍郎程文彝祭○刑部等衙門奏原任江西巡撫李基和

詢以地方事務茫無知識溺職已甚恭逢

聖駕南巡不由正途

迎駕糾道浙江又徑住蘇州不卽前進殊屬不敬應將李基和照

不敬律立決得旨李基和從寬免死著枷號三箇月鞭一百給與

該管王爲奴○丙辰

上駐蹕熱河○

卽書蓋忱義烈額賜殉

耿逆難原任建昌府知府高天爵從其子工部員外郎其佩請也

○己未以安徽布政使施世綸爲太僕寺卿